



Godišnje izvješće  
za 2013. godinu

Sarajevo, 18. 03. 2014.

## **Riječ predsjednika**

### **1. Menadžment**

- 1.1. Unaprjeđenje ljudskih i organizacijskih kapaciteta
- 1.2. Strateško planiranje
- 1.3. Razvoj središnjeg menadžmenta
- 1.4. Usavršavanje i umrežavanje
- 1.5. Lobiranje i prikupljanje sredstava

### **2. Projekti**

- 2.1. *Interkulturalne kreativne sedmice/tjedni IKS*, s. Magdalena Schildknecht, direktorica
- 2.2. *Intercity teatar projekt*, Aida Brdar, projekt koordinatorica
- 2.3. *PREVENTEEN magazin za mlade*, Andrea Mijatović, projekt koordinatorica
- 2.4. *Stariji brat, starija sestra*, Alma Hadžiskakić, projekt koordinatorica
- 2.5. *Mreža Stariji brat, starija sestra BiH*, Melita Husagić, projekt koordinatorica
- 2.6. *Osposobljavanje volontera za mentorski rad sa djecom u riziku*, Alena Velagić, projekt koordinatorica

### **3. Događaji: Proslava Dana Udruženja, 07. 12. 2013.**

### **4. Rukovodstvo i osoblje**

- 4.1. Upravni odbor
- 4.2. Organigram

Sarajevo, 18. 03. 2014. godine

Prof. dr. Ismet Dizdarević, predsjednik UG NARKO-NE

### Plodotvorni ishodi svestranog aktiviteta

Još jedna godina je iza nas, godina koja je pokazala plodotvornost našeg aktiviteta, ishoda izraslih iz sklada djelovanja visoko motiviranih volontera, racionalnog i odgovornog rada članova menadžmenta i usmjeravajućih gledišta Upravnog odbora koji su utemeljeni na dubokom sagledavanju sadržaja i načina realiziranja principa i pristupa prevencije ovisnosti sadržanih u koncepcijskim osnovama UG NARKO-NE. Koliko je korisnog urađeno na prevenciji ovisnosti protekle 2013. godine vidljivo je iz analize aktivnosti sadržanih u nacrtu *Godišnjeg izvješća UG NARKO-NE za 2013 godinu*.

Vidljivo je, zapravo, iz uvida sistematizirano prezentiranih informacija o sadržaju i načinu rada **menadžmenta, o projektima**, vrstama i načinu njihovog ostvarivanja te o uspješnom prezentiranju **programa načina i ishoda djelovanja UG NARKO-NE** saopćenih na dobro organiziranoj proslavi Dana Udruženja 07. 12. 2013.

**Menadžment UG NARKO-NE** je, u skladu sa suvremenim trendovima, izradio model menadžmenta koji odgovara njegovim bazičnim principima i ciljevima. Definirani model menadžmenta je poticajan i svrhovit jer polazi od potrebe unapređenja ljudskih i organizacijskih kapaciteta, od osmišljenosti strateškog planiranja, od dokazane primjerenosti srednjeg menadžmenta za UG NARKO-NE, od ukazanih puteva kojim mogu i trebaju ići procesi usavršavanja i umrežavanja i također, od odgovora na pitanje kako je moguće, u uvjetima šireg društvenog i ekonomskog razvoja, ostvarivati lobiranje i prikupljanje finansijskih sredstava.

Iz prezentiranih informacija o aktivitetu menadžmenta vidljivo je koliko je procedura *izbora zamjenika* direktorice UG NARKO-NE s. Magdalene Schildknecht savjesno, brižljivo demokratski vođena. Svi učesnici koji su sudjelovali u proceduri izbora konstatirali su da će se izborom Amira Hasanovića, diplomiranog socijalnog radnika, *vrlo uspješno, dinamično i fleksibilno rukovođenje s. Magdalene* nastaviti nakon njenog prestanka vršenja ove izrazito važne funkcije u UG NARKO-NE.

Angažmani Mirele Vrane, Adne Hindije i Mahire Brdarić za vršenje određenih funkcija i rad koordinatorice projekta *Stariji brat, starija sestra* u uredu *Franjevačkog studentskog doma* također govore o uspješno okončanim nužnim i opravdanim kadrovskim promjenama. Važno je istaknuti i da su uredski prostori UG NARKO-NE (Josipa Vancaša 21/2) riješeni na najbolji mogući način. *Pregled aktivnosti sadržanih u okvirima strateškog planiranja, razvoja središnjeg menadžmenta, usavršavanja, umrežavanja, lobiranja i prikupljanja sredstava također uvjerljivo govori o značajnom i praktično vrlo djelotvornom djelovanju menadžmenta u prošloj, 2013 godini*.

U sagledavanju obimnih, dobro osmišljenih i praktično uspješno realiziranih aktivnosti obuhvaćenih **projektima** – *Interkulturalne kreativne sedmice/tjedni IKS 13, Intercity teatar projekt, PREVENTEEN, Stariji brat, starija sestra, Mreža stariji brat, starija sestra i Osposobljavanje volontera za mentorski rad sa djecom u riziku* – očito je da možemo biti vrlo zadovoljni i ponosni što pripadamo organizaciji NARKO-NE jer ono što su radili, kako su radili i koliko su postigli volonteri sa svojim voditeljima nadilazi čak i optimistički razine potreba mladih ljudi koje mogu realizirati, mladalački zadovoljnim i društveno opravdanim aktivitetom, u dobrovoljnim organizacijama, zapravo u organizaciji kao što je NARKO-NE.

Navedeni ishodi pri realizaciji koncipiranih projekata mogli su se očekivati jer su mladi volonteri **aktivni sudionici** u poticajnim uvjetima i njihovim uzrasnim interesima i mogućnostima prilagođenim programima. I opis jednog važnog **dogadjaja** – *Proslava dana UG NARKO-NE* - opis toka organizacije, načina prezentiranja programa i zadovoljstvo koje su sudionici proslave sa sobom ponijeli, kao i kako su mediji to prikazali također govori o vrijednosti djelovanja UG NARKO-NE.

Prirodu i kvalitetu svih ovih aktivnosti, koje su sistematično, pregledno i čitljivo prezentirane u *Godišnjem izvješću UG NARKO-NE za 2013. godinu*, nije moguće predstaviti u ovoj kratkoj uvodnoj riječi. Pažljivi čitatelj ovog dokumenta će, uvjereni smo, doći do zaključka do kojeg sam i ja došao, da je prošlogodišnje djelovanje naše organizacije *bilo plodno, edukativno i afirmativno primjereno i društveno korisno*. Plodotvorni aktivitet NARKO-NE u prošloj godini, kao i u ranijim godinama, jasno pokazuje da smo članovi udruženja u kojem djeluju visoko motivirani mladi ljudi, mladi ljudi koji kroz **rad i zabavu** značajno doprinose smanjenju broja potencijalno mogućih ovisnika, ali i zdravijem življenju.

Zapaženi rezultati volonterskog aktiviteta su, nesumnjivo je, ishod spoznaje vrijednosti osobnog volonterskog aktiviteta i osjećanja vrijednosti aktiviteta drugih koje tijekom stalnih i neposrednih aktivnosti uočavaju - ono što i sami nose – *vitalnu energiju, entuzijazam i ispoljene empatije*. Oni znaju i osjećaju da su sa njima i odrasli koji stručno, iskustveno, organizacijski i usmjeravajući djeluju u smjerovima koji najviše odgovaraju ciljevima **najdjelotvornije prevencije ovisnosti**.

U organizacijskoj shemi UG NARKO-NE upisani su nazivi upravnih i izvršnih tijela i imena njihovih članova. Smatram da je poželjno u toku održavanja Skupštine odati priznanje svim članovima upravnih i izvršnih organa te zahvaliti na njihovom doprinosu uspjesima UG NARKO-NE, posebno direktorici Magdaleni Schildknecht i njezinom zamjeniku Amiru Hasanoviću te projektnim koordinatoricama: Almi Hadžiskakić, Andrei Mijatović, Aleni Velagić, Aidi Brdar i Meliti Husagić, menadžment asistentici Aidi Šehagić i stručnim suradnicama: Mireli Vrani, Azri Latić i Andrei Mewaldt.

Zapisnici sa sastanaka upravnih tijela i neposredna komunikacija članova tih tijela rječito govore koliko značajnu ulogu u organiziranju i usmjeravanju djelovanja imaju članovi Upravnog odbora: fra Stipan Radić, Ivona Čelebičić, Marija Grabovac, Ileana Šnur-Muratagić i Tarik Kovač, kao predsjednica Alma Komanović i članovi Nadzornog odbora – Jakov Gavran i Kristijan Hrgić.

## 1. Menadžment

---

S. Magdalena Schildknecht, direktorica UG NARKO-NE

### 1.1. Unaprjeđenje ljudskih i organizacijskih kapaciteta

U 2013. godini fokus je bio usmjeren na unaprjeđenje ljudskih i organizacijskih kapaciteta UG NARKO-NE. Definirani su strateški pravci razvoja organizacije za naredne tri godine te su dugoročno osigurani tehnički uvjeti za rad tima UG NARKO-NE.

Na razini top menadžmenta od 02. 09. 2013. uposlen je Amir Hasanović na poziciji zamjenika direktorice. Cijeli proces odabira budućeg menadžera<sup>1</sup> organizacije (nakon povlačenja s. Magdalene) organiziran je u suradnji sa konzultanticom Andreom Mewaldt *Open Europe Consulting* i uključivao je aktivnosti predselekcije kandidata na osnovu tehničkih kriterija, intervjuja sa šest izabranih kandidata, te cjelodnevno testiranje (Assessment Center) u kojem je učestvovalo pet kandidata. U procesu odabira zamjenika direktorice učestvovala su četiri eksterna saradnika, te cijeli tim NARKO-NE.

Od 01. 03. angažirana je Mirela Vrana za vođenje volonterskog rodnog projekta *Zdravlje iz prirode ZIP* u Varešu. Zaključno sa 28. 02. završio se angažman Adne Hindije, asistentice u projektu *Stariji brat, starija sestra*, i Mahire Brdarić, pripravnice na radnom mjestu u *Službi socijalne zaštite Vogošća*.

Od 16. 09. koordinatorka projekta *Stariji brat, starija sestra* Alma Hadžiskakić radi u kancelariji u *Franjevačkom studentskom domu*, Zagrebačka 18.

U junu je HKO *Kruh sv. Ante*, pokrovitelj UG NARKO-NE, postao vlasnik prostorija u ulici Josipa Vancaša 21/2. Zahvaljujući donatorskim sredstvima, UG NARKO-NE je oslobođeno plaćanja najamnine narednih godina te može koristiti prostor za rad organizacije. S tim u vezi, u ljetnom periodu izvršeni su sanacioni radovi u uredskim prostorijama.

### 1.2. Strateško planiranje

U decembru je uz podršku eksterne konsultantice izrađen prijedlog strateškog razvoja UG NARKO-NE za period 2014. - 2017. Sljedeće strateške smjernice su opisane kao putokaz za kontinuirani razvoj organizacije:

- Profiliranje NVO NARKO-NE kao „grassroots“ organizacije sa snažnim fokusom na svoju misiju i brend u oblasti prevencije primarne ovisnosti i promociji zdravlja u BiH kroz omladinski i rad u zajednici, uključujući rodne implikacije i kooperativnu realizaciju.
- Razvoj ljudskih resursa unutar organizacije, razvoj i uspostavljanje središnjeg menadžmenta kao i sistem upravljanja kvaliteta.
- Jačanje strateškog i javnog prikupljanja sredstava kroz fundraising od strane stakeholdera, promocija filantropije i kooperativnog prikupljanja sredstava
- Unaprjeđenje stručnosti u oblasti prevencije ovisnosti kroz saradnju sa domaćim i međunarodnim stručnjacima te izradu metodološko-didaktičkog materijala.

### 1.3. Razvoj središnjeg menadžmenta

U ovoj godini cijeli tim NARKO-NE je sudjelovao je na dvije od pet planiranih edukacija za razvoj središnjeg menadžmenta.

U suradnji sa konzultanticom Andreom Mewaldt, u periodu 19. - 22. 09. i 29. 10. - 01. 11. fokus je bio na analizi stanja i potreba tima u razvoju središnjeg menadžmenta te na unaprjeđenju tehničkih vještina za središnji menadžment. U 2014. će biti nastavljena edukacija u skladu sa potrebama tima te cijele organizacije.

### 1.4. Usavršavanje i umrežavanje

U 2013. godini uposlenici UG NARKO-NE kontinuirano su radili na vlastitom usavršavanju kako bi unaprijedili kvalitet rada s korisnicima. Intenzivno uključivanje rodne komponente u sve projekte ukazalo je na potrebu dodatne edukacije uposlenika u ovoj oblasti.

Shodno tome, uposlenici su individualno ili kao tim sudjelovali na:

- jednodnevnoj radionici sa eksternim konzultantom na temu uključivanja rodnog koncepta u projekte UG NARKO-NE
- dvanaestodnevnoj edukaciji *Rodnopravni budžeti za mlade (Institut za razvoj mladih KULT)*
- sedmodnevnom *Youth in Action* seminaru *No Woman! No Cry!* u Ankari (Turska)
- četverodnevnoj edukaciji *Rodna ravnopravnost u radu OCD-a (Sarajevski otvoreni centar)*
- jednogodišnjoj online edukaciji *Živjeti u svijetu ravnopravnosti spolova (Centar za pravnu pomoć ženama Zenica)*

Ukupno, sedam supervizija tima je održano u 2013.

Uposlenici i volonteri UG NARKO-NE sudjelovali su i na drugim događajima koje su organizirale vladine i nevladine organizacije kao što su: konferencije, prezentacije, konsultacijski sastanci, monitoring i evaluacije, ali i na drugim aktivnostima značajnim za razvoj civilnog društva u BiH.

---

<sup>1</sup> Svi pojmovi navedeni u muškom rodu, odnose se na oba roda, gdje je to primjenjivo

## 1.5. Lobiranje i prikupljanje sredstava

U toku godine održavani su postojeći te uspostavljeni kontakti sa drugim javnim institucijama na svim nivoima.

Intenzivna suradnja sa općinom Vitez rezultirala je upisom *UG NARKO-NE* u registar omladinskih udruženja na području općine Vitez.

U 2014. godini bit će izvršen upis *UG NARKO-NE* i u registar omladinskih udruženja na području općine Novo Sarajevo. Potpisani su Protokoli o nastavku suradnje sa *JU Kantonalni centar za socijalni rad Sarajevo* i *KJU Disciplinski centar za maloljetnike Sarajevo*.

Osim navedenih, uspostavljen je kontakt s upravom *Grada Sarajeva* i *Federalnim ministarstvom za raseljene osobe i izbjeglice* s ciljem sufinansiranja mentorskih projekata u 2014. godini.

U 2013. godini projekte i aktivnosti *UG NARKO-NE* su 95% financirali međunarodni donatori. Projektima je aplicirano kod osam internacionalnih donatora, sedam javnih institucija na svim nivoima BiH, dvije lokalne NVO i dvije društveno odgovorne kompanije u BiH.

U narednom periodu *UG NARKO-NE* je fokusirano na povećanje iznosa sufinansiranja projekata od strane državnih institucija i društveno odgovornih pojedinaca i kompanija u BiH.

## 2. Projekti

---

### 2.1. Interkulturalne kreativne sedmice/tjedni IKS 13

s. *Magdalena Schildknecht*, direktorica *UG NARKO-NE*

Već 12. put se u Vitezu i 7. put u Varešu implementirao jednomjesečni projekt *Interkulturalne kreativne sedmice/tjedni IKS 12. 07. – 13. 8. 2013. g.* u kojem se realizuju zanimljive i zabavne aktivnosti za mlade i djecu s ciljem ukazivanja na pozitivne alternative u slobodnom vremenu umjesto ovisničkog ponašanja u vezi sa drogom, alkoholom, pušenjem, internetom itd. U Vitezu je sudjelovalo 25, a u Varešu 23 srednjoškolca.

Mladi iz BiH su bili odgovorni za organizacijske zadatke, dok je 12 studenata *Visoke škole za umjetnosti, Visoke škole za socijalni rad* te *Pedagoške visoke škole* iz Švicarske došlo sa mnogo ideja za dnevne radionice sa kreativnim, sportskim, dramskim i umjetničkim aktivnostima u koje je bilo uključeno oko dvjesto djece u tri mjesne zajednice. Mladi su na taj način vježbali vještine liderstva, pregovaranja sa autoritetima, informiranja roditelja te organiziranja završnog događaja za sve sudionike projekta.

#### Kalendar aktivnosti 2013.

- 12. - 15. 07. Prvi susret mladih iz Švicarske i BiH u Visokom: Upoznajmo i organizirajmo se!
- 16. 07. *City Rally* u Vitezu i Varešu: upoznavanje gradova i mladih iz Švicarske i BiH; susret sa načelnikom
- 17. - 20. 07. Zajednički kamp za sve sudionike u lovačkom domu *Igrište* u Varešu
- 22. 7. - 05. 08. Uključivanje djece i mladih u slobodne aktivnosti svaki dan - prijepodne  
Organizirano druženje volontera: sport, izlasci, roštilj, izleti itd.
- 06. 08. *Kids' festival* za svu djecu i mlade - sudionike projekta u centru grada
- 10. 08. - 13. 08. Evaluacija *IKS-a* sa liderima iz Švicarske, Vareša i Viteza

#### Zašto je projekt IKS važan za mlade iz BiH i Švicarske?

*Irfan Jasarević* Smatram da je projekt IKS jedna od boljih stvari koje su se dogodile u Vitezu. Tokom nekoliko sedmica, koliko traje IKS, nevjerovatna je količina znanja i ostalih vještina koje volonteri mogu naučiti, a sve to kroz rad i igru!

#### Što je Švicarcima najdraža osobina vašeg mentaliteta i kulture?

*Jasmin Alihodžić* Mislim da je to što iz ničega pravimo nešto i dokazujemo da ništa nije nemoguće.

*Ana Križanac* Naša opuštenost, prvenstveno za vrijeme rada. Mi kroz šalu pokušavamo izvršiti zadatke, a njih prihvaćamo kao naše istinske prijatelje.

*Tarik Kovač* Naša otvorenost, druželjubivost, gostoprimstvo, humor-šega-šala-pošalica-humoreska-vic-zafrcancija, prisustvo veselja u radnoj atmosferi (u normalnoj količini), fleksibilnost, ishrana, empatija...

Početak aprila grupa od 10 tim lidera iz Vareša i Viteza boravila je na studijskom putovanju u Švicarskoj. Nakon što već jedanaest godina studenti iz Švicarske dolaze u BiH da bi učestvovali u *IKS* projektu, ove godine po prvi put, *IKS-ovci* iz BiH imali su priliku posjetiti svoje prijatelje i upoznati najinteresantnija mjesta u Švicarskoj.

U novembru je u Cirihi organiziran jednodnevni strateški seminar za razvoj i održivost *IKS* projekta na kojem su učestvovali direktorica i zamjenik *UG NARKO-NE*. Rezultat događaja je podrška osnivanju udruženja za *Unaprjeđenje Interkulturalnog omladinskog rada IKJF* u Švicarskoj koja će u buduće zajedno sa *UG NARKO-NE* raditi na realizaciji *IKS* projekta.

## 2.2. Intercity teatar projekt

*Aida Brdar, dipl. scr., projekt koordinatorica*

Projekt je namijenjen srednjoškolicima i srednjoškolkama koji se educiraju kao vršnjački edukatori za prevenciju ovisnosti u lokalnim zajednicama.

U 2013. godini bilo je uključeno 18 srednjoškolaca-volontera iz pet bh. općina: Vogošća, Kreševo, Novo Sarajevo, Istočno Sarajevo i Kakanj.

Tokom 15 dana edukacije i treninga volonteri su osmislili te realizirali preventivni program sedam puta pred oko 500 sudionika u lokalnim zajednicama iz kojih dolaze. Program je osmišljen zajedno sa stručnjacima i profesionalcima iz oblasti glume, pedagogije i socijalnog rada i sastoji se od: teatarske predstave *Naši snovi, naša snaga*, diskusije o aktualnim problemima mladih te pet tematskih mini radionica o ovisnostima i prevenciji ovisnosti.

Volonteri i volonterke su kroz realizaciju programa uspjeli informirati i osvjestiti svoje vršnjake, ali i druge aktere relevantne za pitanje prevencije ovisnosti kod mladih, kako bi ozbiljno pristupili ovoj problematici.

Svoju poruku *Naši snovi, naša snaga* još jednom poslali su svim volonterima i članovima UG NARKO-NE na proslavi *Dana Udruženja* u decembru, čiji je moto bio upravo naziv ove predstave.

Projekt financira *cfđ Christlicher Friedensdienst* (Švicarska) i privatni donator iz Njemačke.

U martu 2014. volonteri projekta će organizirati dvodnevni seminar na kojem će 20 srednjoškolaca iz cijele BiH biti educirano za direktno i kreativno promoviranje *K(NO)W RISKS* kartica i na taj način ukazati vršnjacima na mogućnost izbora za zdrav život.

## 2.3. PREVENTEEN

*Andrea Mijatović, dipl. psih., projekt koordinatorica*

Volonteri, srednjoškolci i studenti istražuju svoje okruženje te potrebe, probleme i mogućnosti mladih predstavljaju autorskim tekstovima u omladinskom magazinu *Preventeen*. Svaki broj ima određenu temu koju dopisnici razrade sa uredničkim timom, studentima, na redakcijskim sastancima u Sarajevu koji se održavaju kvartalno. Dopisnici bolje upoznaju BiH, povežu se sa vršnjacima iz cijele države, uče razmišljati van okvira i razvijaju zdravi tinejdžerski bunt i želju za promjenama.

U 2013. objavljena su izdanja:

21 – *Kako (pre)živjeti srednju školu*, distribuirano 1.114 primjeraka na 339 adresa

22 – *Proglašavam se umjetnicom!*, distribuirano 1.127 primjeraka na 326 adresa

23 – *Preventeenci istražuju*, distribuirano 1.137 primjeraka na 410 adresa

24 - *Riziko i zaštitni faktori mladih sa invaliditetom*, distribuirano 1.419 primjeraka na 410 adresa

U ova četiri broja objavljena su ukupno 83 teksta.

Nakon treninga, redakciji se pridružilo 16 novih dopisnika. Trening je osmišljen da poveže prevenciju ovisnosti, pitanje roda i novinarstvo te volonterima predstavi ne samo teorijsku osnovu nego ih i kroz praktičan rad poveže sa ovim pitanjima.

Novi volonteri su razvili više razumijevanja za novinarstvo kao profesiju i kao životni stil, usvojili vještine pisanja osnovnih novinarskih formi, osvjestili važnost svoje uloge u prijenosu informacija do čitatelja, upoznali stil i način rada u *Preventeenu*, postali svjesni kvaliteta potrebnih da se postane dobar novinar, razvili analitički i kritički pristup novinskom članku, posebno kada je riječ o gender pitanjima. Također, usvojili su osnovno znanje o prevenciji ovisnosti, praktičnom istraživačkom radu i direktnoj komunikaciji sa izvorima.

Projekt financira *cfđ Christlicher Friedensdienst* (Švicarska).

*Kroz jedinstven osjećaj „proganjanja“ volontera za izradu tekstova konstantno se trudimo i potičemo ih da kritički razmišljaju o svemu što ih okružuje u svakodnevnom životu. (Tarik Kovač, dopisnik i član uredničkog tima Preventeena).*

U 2014. će se raditi na definiranju kriterija u svim aspektima rada kako bi se poboljšala kvaliteta konačnog proizvoda te otvorila mogućnost za samoodrživost kroz formiranje mreže pretplatnika.

## 2.4. Stariji brat, starija sestra

*Alma Hadžiskakić, dipl. scr., projekt koordinatorica*

Svako dijete Sarajeva ima svoju mentoricu ili svog mentora uz čiju podršku razvija zdrave ljudske potencijale. Ovom vizijom se vodi UG NARKO-NE u realizaciji projekta *Stariji brat, starija sestra*. Educirani volonteri i volonterke kroz sedmično druženje razvijaju prijateljski odnos s djetetom te za njega predstavljaju pozitivan model za usvajanje socijalno prihvatljivih ponašanja.

U 2013. godini, osim individualnih druženja, 48 parova volontera i djece sudjelovali su i na osam grupnih radionica te na zimskom i ljetnom izletu. Volonteri su dobili podršku na 36 grupnih i 48 individualnih savjetodavnih sastanaka.

Kao što sami volonteri kažu, kod djece su primijetili „najizraženije promjene u poboljšanju komunikacije s njima i sa drugim ljudima te da su djeca otvorenija za širenje svoje socijalne mreže“.

U narednoj godini planirana je intenzivnija suradnja na realizaciji projekta sa *SOS Kinderdorf International – Predstavništvo u Sarajevu* u sklopu programa *Jačanje porodice*, dodatna edukacija za volontere o prevenciji maloljetničkog prijestupništva i pilot-projekt za unaprjeđenje životnih vještina djece.

Projekt je realiziran u suradnji sa *JU Kantonalnim centrom za socijalni rad i KJU Domom za djecu bez roditeljskog staranja*.

U 2014. godini projekt *SBSS* će obilježiti deset godina uspješnog rada. Rezultati će biti predstavljeni u vidu dokumentarnog filma koji će biti prikazan na proslavi Dana *UG NARKO-NE*.

Projekt finansijski podržavaju *Općina Ilidža* i *BH Telecom d. d.*, ali i privatni donatori iz Švicarske.

## 2.5. Mreža Stariji brat, starija sestra Bosne i Hercegovina

*Melita Husagić, dipl. žur., projekt koordinatorica*

Mrežu *Stariji brat, starija sestra* BiH čini sedam organizacija iz: Banja Luke, Foče, Mostara, Sarajeva, Tuzle i Zenice. Sve organizacije realiziraju projekt *Stariji brat, starija sestra* u skladu sa *Standardima kvaliteta* u čijoj su izradi sudjelovale. Zajednički cilj organizacija je doprinos reformi socijalne zaštite u BiH.

Od 2009. godine *Mreža* radi na jačanju kapaciteta profesionalno angažovanih koordinatora projekata, volontera i djece te umrežavanju sa institucijama, odnosno stručnim saradnicima.

U 2012. godini pokrenuta je inicijativa za uspostavu formalne strukture, pa će tako *Mreža SBSS BiH* utjeloviti svoj rad u okviru *Fondacije za podršku i razvoj mentorskih programa „Stariji brat, starija sestra“* koja je registrovana na nivou BiH.

- 25. 12. 2014. godine *Ministarstvo pravde BiH* je odobrilo zahtjev za registraciju *Fondacije za podršku i razvoj mentorskih programa „Stariji brat, starija sestra“*, koji je podnijelo *UG NARKO-NE* kao osnivač
- Izrađen je treći newsletter *Mreže SBSS* i distribuiran u decembru 2013. godine
- 25. – 29. 10. 2013. četiri volonterke iz Banja Luke, Mostara, Zenice i Sarajeva boravile su u Švicarskoj gdje su na *Solidaritatsfestu* predstavile iskustva volontiranja u *SBSS* projektu
- Broj uključenih volontera i djece u projekt *SBSS* u organizacijama u 2013. godini

Organizacija i sjedište	Dječaci	Djevojčice	Ukupno	Volonterke	Volonteri	Ukupno
<i>Nova generacija, Banja Luka</i>	24	23	47	31	16	47
<i>DC Nove nade, Foča</i>	3	12	15	15	0	15
<i>SOS Porodični centar, Mostar</i>	4	6	10	10	0	10
<i>SOS Društveni centar „Hermann Gmeiner“ i Kruh sv. Ante, Sarajevo</i>	13	10	23	4	19	23
<i>UG NARKO-NE, Sarajevo</i>	26	8	34	20	14	34
<i>IPAK-MGB, Tuzla</i>	5	8	13	13	0	13
<i>Medica, Zenica</i>	6	5	11	10	1	11

U 2014. godini Upravni odbor *Fondacije „Stariji brat, starija sestra“* održat će prvi sastanak na kojem će osmisлити plan rada za tekuću godinu.

## Osposobljavanje volontera za namicanje sredstava

Svrha projekta *Osposobljavanje volontera za namicanje sredstava* je osigurati finansijsku održivost projekta *Stariji brat, starija sestra* te poboljšati njegovu vidljivost u Kantonu Sarajevo.

Grupa od 11 studenata *Univerziteta u Sarajevu* od oktobra 2013. godine radi na stjecanju znanja i vještina potrebnih za organiziranje fundraising kampanje te pronalazi inovativne načine za promoviranje projekta. Namjera je kroz projektne aktivnosti poticati građane i građanke te privatna poduzeća da daruju sredstva za dobrobit djece i mladih u Sarajevu.

- U maju 2013. godine uspostavljena je suradnja sa *Fondacijom tuzlanske zajednice* te je razrađen koncept projektne aktivnosti u kojoj pružaju konsultantsku podršku tokom realizacije projekta.
- Na trodnevnom treningu održanom 18. - 20. 10. 2013. godine volonteri su usvojili znanja o organiziranju kampanja za namicanje sredstava i izradili plan aktivnosti za samostalnu realizaciju jedne kampanje.
- Održane su dvije jednodnevne radionice za usavršavanje vještina prezentiranja i pregovaranja

U 2014. godini volonteri će raditi na pripremi i realizaciji kampanje čije glavne aktivnosti će biti javni događaj *Čovječe, ne ljuti se* (koji će biti realiziran u maju) te lansiranje promotivnog videopriloga putem crowdfunding platforme *katapult.ba* u BiH.

## 2.6. Osposobljavanje volontera za mentorski rad sa djecom u riziku

U 2013. godini započela je realizacija projekta *Osposobljavanje volontera za rad sa djecom u riziku* koji predstavlja produženu ruku bivšeg projekta *Usavršavanje mentorica*. U protekloj godini u projektu je sudjelovalo 60 volontera i volonterki.

Aktivnosti su realizirane u sklopu sljedećih pet podprojekata:

#### **a) Od Radionica za učenje do Kluba učenja**

*Alena Velagić, dipl. psih., projekt koordinatorica*

Kroz projekt učenici 6. i 7. razreda dobivaju podršku od educiranih volontera, srednjoškolaca, pri izradi domaćih zadaća. Kroz igru i kreativne aktivnosti poboljšavaju motivaciju za učenje te razvijaju efikasne metode i tehnike učenja.

Godina 2013. bila je jedinstvena po tome što su se četiri volontera nakon završene faze u školskoj 2012./2013. odlučili za nastavak angažmana te preuzeli ulogu mentora za novu grupu volontera u novom projektnom ciklusu u šk. 2013./2014.

Novi volonteri su učenici 2. i 3. razreda srednje škole koji će također naredne školske godine raditi na jačanju svojih mentorskih vještina.

U protekloj godini u projektu je učestvovalo 35 volontera i volonterki iz tri bh. grada: Ilijaš, Sarajevo i Breza. Realizirano je: 56 radionica, 3 velika jednodnevna izleta, 6 edukativnih šetnji gradom za učesnike iz Sarajeva i 3 završne zabave za učesnike projekta.

Sudjelovalo je oko 100 učenika osnovnih škola od 5. do 8. razreda iz: OŠ *Enver Čolaković* iz Breze, OŠ *Hašim Spahić* iz Ilijaša, *KJU Dom za djecu bez roditeljskog staranja Sarajevo* iz Sarajeva te srednjih škola *MSS Mehmedalija Mak Dizdar Breza*, *SŠC Nedžad Ibrišimović Ilijaš* i *Srednja škola za okoliš i drvni dizajn Sarajevo*.

U 2014. godini planirano je raditi na proširenju projekta na druge općine u BiH. Nakon izrade priručnika bit će organizirana edukacija zainteresiranih profesionalaca koji će implementirati projekt u svojoj lokalnoj zajednici.

#### **b) Radionice za uspješno studiranje – Coaching studenata prvih godina**

*Alena Velagić, dipl. psih., projekt koordinatorica*

Projekt je namijenjen studentima iz manjih mjesta. Cilj je da razviju metode učenja i studiranja, usvoje vještine vremenskog i financijskog menadžmenta, uspostave zdrav ritam života i prošire svoje socijalne mreže kako bi uspješno završili prvu godinu studija.

U 2013. godini projekt je realiziran u dvije faze: do jula prva faza i od oktobra druga faza koja je još uvijek u toku. U prvoj fazi sudjelovalo je šest studenata prvih godina. Održano je 15 radionica i jedan završni događaj. U drugoj fazi sudjeluje devet studenata.

Do kraja 2013. godine angažirana su četiri studenta starijih godina koji imaju ulogu mentora te sa brucošima rade na prevazilaženju ličnih i studentskih problema. Ukupno je organizirano osam tematskih radionica za snalaženje u gradu i metode učenja te tri zajednička događaja.

Zbog dodatne edukacije voditeljice, ali i nakon obavljene analize uspješnosti projekta, u 2014. godini osim redovitih sedmičnih radionica radit će se i individualno sa studentima, na njihovom ličnom unaprjeđenju i usmjeravanju ka cilju, dok će pri realizaciji samih radionica biti veća uključenost studenata mentora.

#### **c) Edukativni rad s djecom u riziku**

*Aida Brdar, dipl. scr., projekt koordinatorica*

U okviru projekta studenti i studentice društvenih nauka kroz volonterski rad u *Disciplinskom centru za maloljetnike* stječu praktično iskustvo u radu s djecom. Aktivnosti su usmjerene na razvoj socijalnih vještina i zdravih navika kod djece.

U 2013. godini je do jula bilo uključeno osam studenata, a od oktobra njih deset. Sudjelovali su u različitim edukativnim i zabavnim aktivnostima s djecom, u ukupnom trajanju od oko 500 sati. Volonterima je pružena kontinuirana mentorska podrška te interna i eksterna edukacija.

*Volontiranje u Centru je pridonijelo tome da se promijenim kao osoba. Postala sam mnogo odgovornija, razvila sam osjećaj razumijevanja i tolerancije, upoznala nove ljude, tačnije, razvila sam se u svim aspektima. Radujem se svakom odlasku u Centar jer znam da će me dočekati topli dječji osmjesi.* (volonterka Tamama)

Do kraja školske godine bit će intenziviran individualni rad sa studentima sa fokusom na razvoj njihovih individualnih planova za rad s djecom. Također, planiraju se dva veća događaja za djecu te eksterne edukacije za volontere.

#### **d) Follow ups – Projekt podrške bivšim učesnicima projekta *Stariji brat, starija sestra***

*Aida Brdar, dipl. scr., projekt koordinatorica*

Projekt je usmjeren na osnaživanje srednjoškolaca kroz podršku u razvoju vještina komuniciranja, organizacije i planiranja.

Usvojene vještine i znanje praktično primjenjuju kroz volonterski angažman u *Centru za zdravo starenje* (organiziranje zajedničkog odlaska u kino sa korisnicima *Centra*, organiziranje informatičkih radionica i instrukcija za korisnike i sl.).

U periodu od januara do jula bila su uključena četiri volontera koja su provodila dva sata sedmično u *Centru za zdravo starenje*.

*Ono što sam naučio i u ovom projektu i što ću koristiti u budućnosti jest kako prezentirati, kako ispuniti aplikaciju, kako funkcionise „Centar za zdravo starenje“ i cijela administracija, šta sve treba uraditi da bi se organizovao izlet za djecu.* (volonter Kemo)

Volonteri projekta *Follow ups* angažirani u *Centru za zdravo starenje* od ove godine su uključeni u organizaciju izleta i grupnih aktivnosti za djecu i volontere projekta *SBSS*.



## e) Zdravlje iz prirode

Mirela Vrana, stručna suradnica

Projekt se implementira u Varešu i ima za cilj osposobiti sudionice - srednjoškolke za aktivno sudjelovanje u društvu promovirajući zdrave stilove života kroz istraživanje i izradu prirodnih preparata i proizvoda koristeći tradicionalnu baštinu i recepte.

U 2013. godini 12 sudionica je sudjelovalo u 40 praktičnih i edukativnih radionica na kojima su izrađivale prirodne proizvode za njegu, educirale se iz organizacije javnih događaja, izrade poslovnog plana, pisanja saopćenja za medije, komuniciranja sa lokalnim autoritetima, zagovaranja i timskog rada.

Naučeno je praktično primijenjeno organizacijom četiri *Salona zdravlja*, dva *Prodajna štanda* u Sarajevu i Varešu, sudjelovanjem u radioemisijama i pisanjem članaka, ali i prezentiranjem izrađenih proizvoda u neformalnim grupama sa kolegicama iz škole.

*Učešćem u projektu naučila sam izrađivati zdrave proizvode, iskoristiti prirodu za svoje zdravlje. Upoznala sam baštinu svoje bake kroz recepte koje mi je dala, tako da je ovaj projekt za mene neprocjenjivo iskustvo.* (Ivana Šafradin, sudionica).

Od februara 2014. godine projekt se odvija u dvije faze.

U prvoj fazi učesnice stječu znanja i vještine za izradu poslovnog plana i organiziranja *Prodajnog štanda*, a u drugoj fazi istražuju zaboravljene tradicionalne društvene igre i organiziraju igraonice za najmlađe s ciljem prevencije ovisnosti o internetu.

## 3. Događaj: Proslava dana UG NARKO-NE, 7. 12. 2013.

---

Amir Hasanović, dipl. scr., zamjenik direktorice UG NARKO-NE

Ovogodišnja proslava odvijala se pod motom **Naši snovi, naša snaga!** s ciljem povezivanja zajedničkih snova i snaga gostiju i UG NARKO-NE kako bi i dalje mijenjali okruženje da bude ljepše, bolje i zdravije.

Na proslavu je **pozvano** ukupno 359, od čega je **prisustvovalo** 178 osoba.

Ukupno 55 volontera i volonterki sudjelovalo je u pripremnim aktivnostima (izrada plakata o projektima, priprema i organiziranje predstavljanja projekata, priprema i sudjelovanje u medijskim aktivnostima, priprema i organiziranje putovanja za grupe volontera i sl.).

Program su činili:

**Predstava** *Naši snovi, naša snaga* Intercity teatar projekta

**Obraćanja** s. Magdalene Schildknecht, direktorice UG NARKO-NE  
prof. dr. Ismeta Dizdarevića, predsjednika UG NARKO-NE

**World Cafe** Razgovori gostiju u malim grupama

**Radionice** Povezivanje zajedničkih snova i snaga sa gostima i volonterima Intercity teatar projekta

**Prevenijada – Predstavljanje projekata u 2012./2013. godini koje su izveli volonteri i volonterke** (geste, mimika, držanje tijela, povezanost ljudi kao i određeni predmeti, korišteni u projektnim aktivnostima)

Dodijeljeno je 177 **certifikata volonterima/kama angažiranim u projektima u protekloj godini.**

Prateći segmenti programa bili su:

- **Izložba plakata o projektima**
- **Zakuska** koju je pripremio *JU Studentski centar Sarajevo*
- **Dodjela zahvalnica**, posebni kolači za doprinos osam volontera/ki i saradnika/ica radu UG NARKO-NE.

Događaj su najavile tri radiostanice, proslavu su na licu mjesta popratile četiri televizijske kuće, dok su volonteri i zaposlenici gostovali na dvije televizije, a sam događaj je opisan na šest web stranica. Članak o proslavi je objavljen u biltenu NVO vijeća te u časopisu *Svjetlo riječi*.

O proslavi su izvjestili, ili je najavili

**TV** FTV, TV Sarajevo, Hayat, TV KISS, TV Vogošća, FACE TV

**Radio** BH radio, Radio M, Radio KISS

**Web** klix.ba, federalna.ba, patria.ba, sarajevotimes.com, kolibe.com, ba.a2-news.com

## 4. Rukovodstvo

---

s. Magdalena Schildknecht, direktorica UG NARKO-NE

### 4.1. Upravni odbor

Upravni Odbor održao je ukupno četiri sjednice i Godišnju skupštinu. Na sjednicama se redovno vodio zapisnik koji je arhiviran u Udruženju. Datumi sjednica i tema o kojima se raspravljalo su:


26. 02. 2013. Pripreme za 11. Skupštinu *Udruženja* 2012. godine

26. 03. 2013. 11. godišnja redovna Skupština u *Centru za zdravo starenje*, općina Novo Sarajevo

18. 06. 2013. Usvajanje Zapisnika sa 11. godišnje Skupštine UG NARKO-NE od 26. 03. 2013., potpisivanje Ugovora o radu s Amirom Hasanovićem, designiranim zamjenikom direktorice, odluka za održavanje vanredne on-line Skupštine u vezi registracije *Fondacije za razvoj i podršku mentorskih projekata „Stariji brat, starija sestra“*.
08. 10. 2013. Predstavljanje prijedloga za proslavu Dana *Udruženja*, 07. 12. 2013., susret sa Hansom Strubom, predsjednikom *Verein Idemo* u Švicarskoj, čestitke i proslava za upis UG NARKO-NE u općinski spisak omladinskih udruga/udruženja na području općine Vitez
12. 11. 2013. Održavanje 4. sjednice u Župi sv. Ante u Lepenici gdje je fra Stipan Radić župnik, razgovor o planovima za 2014. godinu kao što su *Peace event Sarajevo, City Rally* itd.

Ovom prilikom zahvaljujemo se fra Josi Oršoliću, ravnatelju našeg pokrovitelja *HKO Kruh Svetog Ante*, kao i *Franjevačkoj provinciji Bosne Srebrene* za podršku našem djelovanju.

#### 4.2. Organigram



Josipa Vancaša 21/2 (Ured)  
Zagrebačka 18 (sjedište)  
Sarajevo, Bosna i Hercegovina

Tel. +387 33 215 088

Fax: +387 33 223 285

e-mail: [narkone@narkone.org](mailto:narkone@narkone.org)

[www.narkone.org](http://www.narkone.org)